

靈寶自然九天生神三寶大有金書 證
 天寶君者則大洞之尊神天寶丈人則天寶
 君之祖炁也丈人是混洞大元元高上玉皇
 之炁九萬九千九百九十億萬炁後至龍漢
 元年化生天寶君出書時號高上大有玉清
 官

靈寶君者則洞玄之尊神靈寶丈人則靈寶
 君之祖炁也丈人是赤混太元元上玉虛之
 炁九萬九千九百九十九萬炁後至龍漢開
 圖化生靈寶君經一劫至赤明元年出書度

人時號上清玄都二京七寶紫微官
 神寶君者則洞神之尊神神寶丈人則神寶
 君之祖炁也丈人是冥寂玄通元上玉虛之
 炁九萬九千九百九十萬炁後至赤明元年
 化生神寶君經二劫至上皇元年出書時號

三皇洞神太清太極宮此三號雖年殊號異
 本同一也分為玄元始三炁而治三寶皆三
 炁之尊神號生三炁三號合生九炁九炁出
 乎太空之先隱乎空洞之中無光無象無形
 無名無色無緒無音無聲道運御世開闢玄

通三色混沌乍存乍亡運推數極三炁開光
 炁清高澄積陽成天炁結凝淨積滯成地九
 炁列正日月星宿陰陽五行人民品物並受
 生成天地萬化自非三元所育九炁所道莫
 能生也三炁為天地之尊九炁為萬物之根

故三合成德天地之極也人之受生於胞胎
 之中三元育養九炁結形故九月神布炁滿
 能聲聲尚神具九天稱慶太一執符帝君品
 命主錄勒藉司命定算五帝監生聖母衛房
 天神地祇三界備守九天司馬在庭東向讀

九天生神寶章九過男則萬神唱恭女則萬
 神唱奉男則司命敬諾女則司命敬順於是
 而生九天司馬不下命章萬神不唱恭諾終
 不生也夫人得選生於人道濯形太陽驚天
 駭地貴亦難勝天真地神三界齊臨亦不輕

也當生之時亦不為陋也所以能愛其形保
 其神貴其炁固其根終不死壞而得神仙骨
 肉同飛上登三清是與三炁合德九炁齊并
 也但人得生而自不能尊其炁貴其形實其
 命愛其神自取死壞離其本真耳九天生神

章乃三洞飛玄之炁三合成音結成靈文混
 合百神隱韻內名生炁結形自然之章天寶
 誦之以開天地之光靈寶誦之以開九幽長
 夜之魂神寶誦之以制萬靈太一誦之以具
 身神帝君誦之以結形九天誦之以生大學

士誦之以昇天鬼靈聞之以昇遷凡夫聞之
 以長存幽魂聞之以開度枯朽聞之以發煙
 嬰孩聞之以能言死骸聞之以還人三寶神
 與萬品生根故非鬼神所知凡夫所聞也夫
 學上道希慕神仙及得尸解滅度轉輪終歸

仙道形與神同不相遠離俱入道真而無此
 文則胞胎結滯死氣固根具景不守生炁無
 津九戶闕塞體不生神徒受一形若寄炁而
 行學得此法可坐致自然三寶尊重九天至
 真秘之大有九重金格紫陽玉臺自非天地

一開其文不出元始禁書非鬼神所聞竊之
 者風刀萬劫魂死無生依科遵奉形神同仙
 三元宮中宿有金名紫字刻書來生應為三
 清神仙之人當得此文有其緣會當齊金寶
 奉師效心依科盟受閉心奉行慎勿輕泄風

刀考身修行之法千日長齋不關人事諸塵
漏盡夷心默念清香執戒入室東向扣齒九
通調聲正炁誦詠寶章誦之一過聲聞九天
誦之二過天地設恭誦之三過三界禮房誦
之四過天王降仙誦之五過五帝朝真誦之
六過魔王束身誦之七過星宿停關誦之八
過幽夜光明誦之九過諸天下臨一切神靈
莫不衛軒一過徹天胞原宣通二過誓地胎
結解根三過神禮魂門練仙四過天王降仙
魄戶閉關五過五帝朝真藏府清涼六過魔
王伏諾管生津七過星宿明孔竅開聰
八過幽夜顯光三部八景整具形神九過諸
天下臨三關五藏六府九宮金樓玉室十二
重門紫戶玉閣三萬六千關節根源本始一
時主神九過為一編一編周竟三界舉名五
帝友別稱為真人十徧通悉制御萬靈魔王
保舉列上諸天百徧通神坐致自然太一度
符元君受生千徧通靈坐在立亡仙童玉女
役使東西萬徧通備馳騁龍駕白日登晨
元始天尊時靜處閭居偃息雲宮黃房之內

七寶幃中熙夷養素空碧練真耽咀洞慧備
研生神理微太混彌朗九天是時飛天大聖
無極神王玉輔上宰四協侍展清齋建節侍
在側為憑瓊顏而妙感仰靈眸而開矜竊神
章而踴躍餐天音而蒙生敢乘機而悟會冒
靈盼而披心於是飛天大聖無極神王前進
作禮稽首而言上白天尊賦臣幸會得仰侍
靈軒不以短袂叨濯冥津重悟凝玄位登神
王總御生死頌括天仙賞監七覺遠覽遐方
雍觀上宰對司侍展方當乘機應會履九太
陽洞理陰符撫掌兆民大運將期數終甲申
洪流蕩穢凶災彌天三官鼓筆料別種人考
算功過善惡當分自赤明以來至上皇元年
依元陽玉匱受度者應二十四萬人開皇以
後數至甲申諸天選序仙曹空廢官僚不充
遊散職司皆應選人依元陽玉匱當於三代
更料有心積善建功為三界所舉五帝所保
名在上天者取十萬人以充其任又當別舉
一十二萬人以充儲官如此之例或以宿名
玄圖或以骨像合仙或以滅度因緣轉輪或

以萬好三寶善功徹天或供養師寶為三官
所稱或修齋奉戒功德積感或施散財寶建
立道堂或救卹窮乏濟度天人或為三師建
功充足天官有名考算簿錄三官相應皆逆
註種名上下有別毫分無遺又九幽之府被
東華青宮九龍符命使拔九幽玉匱男女死
鬼宿名有善功德滿足應受開度者取三十
二萬人以充甲申驅除之後開大有之民當
此之時生死交會善惡分判得過者真為樂
哉然三官相切文墨紛紜龍門受會烏母督
仙萬聖顯駕晝夜無間功過平等使生死無
偏此之昏闕亦臣之憂矣大期既切觸事關
替恒恐一旦受罹公門伏聞天尊造大慈之
化垂憐蒼生開九天之典以濟兆民明科有
禁戒非賤臣所可參聞然大數有期甲申垂
終運度促急大法宜行使有心者得於考算
之中聞於法音開示於視聽勸化於未悟者
也緣茲上陳懼觸天顏願見哀憐賜所未聞
於是
天尊撫几高抗凝神遐想仰誦洞章彌誦琳

琅良久忽然嘆曰上範虛漢理微太幽道達
重玄悉冠神霄至極難言妙亦難超子既司
帝位受任神王飛天翼於瓊闕四室輔於明
輪遐盼極覽領綜無窮雍和萬化撫料蒼生
今大運啟期三五告辰百六應機陽九激揚

洪泉鼓波萬災厲天四宮選舉以充種民三
代昏亂善惡宜分子當勞心兆庶疲於三官
興廢之際事須開能今以相委其勉之焉寶
書妙重九天靈音施於上聖非鬼神所聞明
真有格四萬劫一行令冒禁相付子秘之矣
慎勿輕傳登命九天司馬侍仙玉郎闍紫陽
玉艾雲錦之裳出九天生神玉章四輔列位
五老監真太一命辰玉帝唱盟一依俯仰明
真具典南向長跪以付飛天無極神王法事
既畢請天復位

天尊重告飛天神王此九天之意乃三洞飛
玄之炁三會成音結成真文混合百神隱韻
內名故太一試觀攝生十方領會洞虛啓誓
丹青自無億劫因緣宿名帝圖不得參見得
既篇目九祖同仙當採擇其人應為仙者七

百年中清齋十日齋金縉著心依盟以傳慎
之則事祚漏之則禍臻享祚則福延九祖德
重山海招禍則考流億劫痛於毒湯風刀相
刑可不慎之焉

始青清微天寶章

元始洞空無 三炁精上門 紫容觀太空
四明植靈根 妙化發東瓊 三翻起西崑
號應九玄清 五華帶錦雲 離羅煥神燈
七精耀北玄 飄飄上清畿 奕奕帝一尊
落落高上章 羽童何紛紛 流香本無色
洞入萬仙羣 左迴三流劫 右轉九天關
金華纓玉童 八風舞空輪 四時無停機
青白早明分 九九改劫運 三三度一春
天地有終會 祕激歸在翻 洞明正一法
嚴修六天文 太平返空無 來期後聖君

元白禹餘靈寶章

靈風起西門 錦雲生東瓊 三炁煥玉洲
流香乘東輕 玉華披風散 倏忽朗九清
霧林耀朱日 黃水逐月生 中有採芝童
永羽戴飛青 颯景萬領風 逍遙宴綠軒

總御九空輪 運開萬稽程 左命三天文
右攝六天兵 檢悉返空洞 六度應運傾
劫運自有會 誰測敗與成 弘波輪靈豎
六合無遺形 白屍漂長流 孤鬼因復靈
悲此去來際 乃覺正法明 至學加措修

東華結璣名 欣有白簡人 相與樂太平

玄黃太赤神寶章

洞關運天網 五炁輪三微 紫戶吐瓊簡
金門納神眸 八會交真風 晃朗重名開
天際九清外 落落高神迴 三色返空無
四候應玉畿 河侯已鼓筆 五行潛相推
六度無終劫 運極乘炁歸 萬魔羅天布
羣兇竟吐威 兆民負災衝 積屍令人悲
妙哉正法文 理劫明不表 至時奉相迎
契在九天飛 與爾期太平 放心無翻飛

靈寶自然九天生神三寶大有金書